

Ligcogco Letindzaba

SISWATI

LULWIMI LWASEKHAYA

ITHEMU 3



LIBANGA 2





Ligcogco Letindzaba

LIBANGA 2 | ITHEMU 3

SISWATI

**Copyright © 2026 National Educational
Collaboration Trust (NECT)**

This work is licensed under a **Creative Commons
Attribution–NonCommercial–NoDerivatives 4.0
International License (CC BY-NC-ND 4.0)**.

Additional permissions beyond the scope of this license
may be available. For further information, please
contact the publisher at **materials@nect.org.za**.

First edition, 2026





ITHEMU 3



LIBALAVE LASENINGIZIMU AFRIKA



INyakatfo Kapa



INshonalanga Kapa



Sivivinyo
setibalo
lesilula
saLindenani

Lwandle
i-Atlantshiki





ILimpopo



Emaholide
asebusika

IMpumalanga



Musa
Motha:
Umdansi
lophikisana
nemanela
ekudvonsela
phasi



Munene
utfola
lusito

INyakatfo-
nshonalanga

I-Gauteng

IFreyistata



Emacandza
aJabu
lasikrembuliwe

IKwaZulu
Natali



IMpumalanga Kapa



Iloli lengu-
Chuck

Lwandle
IweNdiya



LIBALAVE LEMHLABA



IMelika
leseNyakatfo

Emahlengetfwa
ayasindzisa

Lwandle
i-Atlant'hiki

Lloyd, mpetha
wekudansa

IMelika
leseNingizimu

Lwandle
iPhasifiki



I-Eshiya



IYurophu



I-Afrika



Lwandle
iPhasifiki



I-Ositreliya

Lwandle
IweNdiya



I-Anthathikha

ITHEMU 3 TINDZABA



Iloli lengu-Chuck

1



Emaholide asebusika

13



Emacandza aJabu lasikrembuliwe

25



Sivivinyo setibalo lesilula saLinden

33



Lloyd, mpetha wekudansa

47



Musa Motha: Umdansi lophikisana
nemandla ekudvonsela phasi

61



Emahlengetfwa ayasindzisa

75



Munene utfolo lusito

91

INDZABA 1

ILOLI LENGU-CHUCK

Ingcikitsi: Sinabela kwalabanye



Imininingwane yangaphambilini

- Lombhalo uyindzaba lengasilo liciniso.
- Yenteka endzaweni lengatiwa.
- Yenteka esikhatsini sanamuhla.
- Lenzaba itawusita bafundzi bakho bavisise kutsi wonkhe umuntfu unetintfo letehlukile latenta kahle nekutsi kuticatsanisa nalabanye kungakwenta ungakuboni loko lokukwenta ube ligugu.



Lisu lesivisiso: Hlola kuvisisa

- Kuyini: Kutihlola kuvisisa kwakho njengobe usafundza nekuma kancane nangabe kukhona longakuvisisi.
- Kungani sikusebentisa: Kute ubone nangabe kukhona longakuvisisi bese uyakulungisa.
- Kusita njani: Kukwenta uhlale unemlandla wekufundza futsi kutfutukisa indlela lovisisa ngayo ngekusheshe ulungise longakuvisisi.



Lamanye emaphuzu ekwabela bafundzi bakho


- Timoto letihlukahlukene takhelwe kwenta imisebenti lehlukahlukene. Sibonelo, ibhasi itfwala bantfu, sikebhe sihamba emantini, kantsi-ke iloli itfwala umtfwalo losindzako.
- Ngalesinye sikhatsi, siticatsanisa nalabanye. Singahle sibuke tintfo talabanye noma emakhono abo sibese sifisa shengatsi bekungitsi banikato bawo. Loku kungasenta sitive singakanetiseki ngaloko lesingiko.
- Wonkhe umuntfu unemandla langafana newalabanye. Bantfu banemakhono labaphiwe kuwo ngetindlela letihlukile. Lomunye umuntfu unematubane, kantsi lomunye unesiphiwo sekudvweba noma sekusita labanye.
- Ngalesinye sikhatsi inkinga ayicatululeki ngendlela letayelekile, ngako-ke bantfu kumele bacabange sisombululo lesikhaliphile.



Kute usebentise lelisu:


Likhasi nesigaba	Fundza	Tsani
4,1	Chuck wabuka sitimela lesiluhlata sasibhakabhaka lebesihamba sendlula ngesivinini lesikhulu. “Ngifisa sengatsi ngabe nami ngigijima njengalesitimela,” kwacabanga Chuck. Chuck wabuka ibhasi lenkhulu lesawolintji lebeyihamba yendlula. “Ngifisa sengatsi ngabe bengimkhulu njengaleya bhasi,” kwacabanga Chuck.	Awutsi ngime ngicabange... Awutsi ngihlole kutsi ngiyavisisa: Ngiyavisisa kutsi Chuck utitsatsela phasi futsi ucabanga kutsi letinye titfutsi tincono kunaye ngetindlela letihlukene.
8,1	Chuck wahlala ngasemfuleni, eva buhlungu. “Wonkhewonkhe uyasheshisa nobe mkhulu nobe muhle kungendlula!” kwacabanga Chuck akhatsatekile. “Ngimncane. Ngihamba kancane. Kute lapho ngikahle khona!” washo engcondvweni yakhe aticabangela.	Awutsi ngime ngicabange... Awutsi ngihlole kutsi ngiyavisisa: Chuck utiva angajabuli uma aticatsanisa naletinye titfutsi. Ngicabanga kutsi lesigameko siveta inkinga kulenzaba.

Chuck bekayiloli lencane lemtfubi lenencola legenukako. Ngalelinye lilanga Chuck wangena emgwacweni lomkhulu atfwele umtfwalo wematje lomkhulu.



Chuck wabuka sitimela lesiluhlata sasibhakabhaka lebesihamba sendlula ngesivinini lesikhulu. “Ngifisa sengatsi ngabe nami ngigijima njengalesitimela,” kwacabanga Chuck.

Chuck wabuka ibhasi lenkhulu lesaliwolintji lebeyihamba yendlula. “Ngifisa sengatsi ngabe bengimkhulu njengaleya bhasi,” kwacabanga Chuck.




Chuck wabona indiza lenkhulu lemhlophe lemanyatelako indiza esibhakabhakeni. “Ngifisa sengatsi ngabe nami ngimanyatela njengaleya ndiza,” kwacabanga Chuck.

Chuck wabona iloli lenhle lebovu emgwacweni. “Hho ngifisa sengatsi nami ngabe ngimuhle njengaleya loli lebovu,” kwacabanga Chuck.




Chuck wabona sikebhe lesinembala logcamile loluhlata njengetjani sintjuza emfuleni. “Ngifisa sengatsi nami ngabe nginembala loluhlata njengetjani logcamile njengalesikebhe,” kwacabanga Chuck.



Chuck wabona imoto yemjako lenhle futsi lensha, lenembala lobovu. “Ngifisa sengatsi ngabe ngimuhle njengaleya moto yemjako,” kwacabanga Chuck.



Chuck wahlala ngasemfuleni, eva buhlungu.
“Wonkhewonkhe uyasheshisa nobe mkhulu
nobe muhle kungendlula!” kwacabanga Chuck
akhatsatekile. “Ngimncane. Ngihamba kancane. Kute
lapho ngikahle khona!” washo engcondvweni yakhe
aticabangela.



Masinyane-nje, Chuck wabona umfana lomncane agcumukela emfuleni.

“Inyandzaleyo! Inyandzaleyo!” kwamemeta umfana acela lusito. “Ngicela ningisete-bo! Ngubani longangisita?”

“Angeke ngikhone,” kwasho sitimela. “Ngigijima kakhulu angeke ngikhone kuma. ”

“Angeke ngikhone,” kwasho ibhasi. “Ngikhona kuma esiteshini sebhasi kuphela.”

“Angeke sikhone,” kwasho iloli nemoto yemjako. “Angeke sikhone kungena emantini.”

“Angeke ngikhone,” kwasho indiza. “Ngisetulu kakhulu.”

“Angeke ngikhone,” kwasho sikebhe. “Umoya uhhusha kakhulu angeke ngikhone kujika.”



Chuck abengeke akhone kungena emantini. Kodvwa bekahlakaniphile. Bekanelicebo!

“Ngitakusita!” kwasho Chuck lomncane. Wacitsa onkhe ematje lebekawatfwele, wayingenisa emantini incola yakhe legenukako kute kutsi lomfana agibele lapha encoleni. “Ngiyabonga!” kwamemeta lomfana lomncane. “Ngisindzile!”



“Ngiyabonga loli lemtfubi lenesibindzi!” kwasho lomfana.

Chuck wahamba wabuyela emuva ekhaya ngemuva kwekusindzisa lomfana. “Ngingete ngaba mkhulu nobe ngikwati kusheshisa nobe ngibe muhle,” kwacabanga Chuck, “kodvwa ngibalulekile nami! Ngiyatitsandza ngalendlela lengingayo.”





Kufundza 1

Uyini Chuck?

Chuck yiloli lencane lemtfubi lenencola legenukako.

Ufuna kuba yini Chuck?

- Sitimela lesigijimako
- Ibhasi lenkhulu
- Indiza lemanyatelako
- Iloli lenhle
- Sikebhe lesigcamile
- Imoto yemjaho lensha nalenhle

Kungani Chuck bekahleti ngasemfuleni eva buhlungu?

- Kungoba bekafisa kutsi ngabe bekamkhulu.
- Kungoba bekafisa kutsi ngabe uyakwati kugijima.
- Kungoba bekafisa kutsi ngabe uyacwebetela.
- Kungoba bekafisa kutsi ngabe ugcamile.
- Kungoba bekafisa kutsi ngabe uyakwati kundiza.
- Kungoba bekafisa kutsi ngabe uyakwati kungena emantini.
- Kungoba bekafisa kutsi ngabe ufana naletinye titfutsi latibonako.



Kufundza 2

Chuck usindzise bani?

Usindzise umfana lomncane lobekagcumukele emfuleni.

Utsiteni umfana lomncane ngemuva kwekusitwa ngu-Chuck?

Utsite “ngiyabonga!” waphindze watjela Chuck kutsi unesibindzi.

Kungani Chuck watibona abalulekile ekugcineni kwalendzaba?


- Kungoba ube nelisu lelihle.
- Kungoba wente intfo lengeke yentiwe ngulesinye sitfutsi.
- Kungoba nguye kuphela lokohone kusindzisa umfana.
- Kungoba utiva ajabule kakhulu ngaloku lakwenta.
- Kungoba utibonile kutsi ubalulekile ngendlela yakhe.

INDZABA 2

EMAHOLIDE

ASEBUSIKA

Ingcikitsi: Sinabela kwalabanye



Imininingwane yangaphambilini

- Lombhalo uyindzaba lengasilo liciniso.
- Yenteka eNingizimu Afrika.
- Yenteka esikhatsini sanamuhla.
- Lenzaba itawusita bafundzi bakho bavisise kutsi kunabela lokwenteki kulabanye kungasenta singatinaki tintfo letinhle letenteke etimphilweni tetfu.



Lisu lesivisiso: Chumanisa

- Kuyini: Kucabanga ngekutsi lendzaba ihlangana njani nekuphila kwakho, naletinye tincwadzi nobe nemhlaba.
- Kungani sikusebentisa: Kute uyivisise kancono lendzaba ngekuyihlanganisa netintfo lesewuvele utati.
- Kusita njani: Kwenta lendzaba ivakale kahle futsi kube melula kuyikhumbula.



Lamanye emaphuzu ekwabela bafundzi bakho

- Uma bantfwana babuyela esikolweni ngemuva kwekuvalwa kwetikelwa, bavamise kutekela bangani babo mayelana naloko bebakwenta kanye netindzawo bebativakashele.
- Imindeni lehlukene icitsa sikhatsi semaholide ngetindlela letihlukene. Leminye imindeni itsatsa luhambo iye etindzaweni letinsha, leminy e ikhatsa kutihlalela ekhaya icitse sikhatsi lesikhethsekile nemndeni wonkhe.
- Ngalesinye sikhatsi, bantfu bacatsanisa timo tabo netalabanye. Ngalesinye sikhatsi, bantfu nabeva ngalokutsite lokutfokotisako lokwenteki kulomunye babese bafisa shengatsi kube kwenteke kubo.
- Kucitsa sikhatsi nemndeni kungaba yintfo lenhle, nanoma lomndeni ungatsatsi luhambo lwekutikhipha uyoshaywa ngumoya. Akudzingeki kutsi umndeni utsatse luhambo uye khashane kute ube nesikhatsi lesimnandzi semaholide. Nako kucitsa sikhatsi nebantfu lobatsandzako kungakha tinkhumbulo letimnandzi.



Kute usebentise lelisu:

Likhasi nesigaba	Fundza	Tsani
17,4	“Hho,” kwasho Zweli. “Nami ngifuna kuya khona.”	Hho, letimphophoma tiyamangalisa! Ngingenta sichumaniso ngekubhekisa kuZweli. Umngani wami watsatsa luhambo waya lwekuyobona tilwane tesiganga. Wabuya watongikhombisa tonkhe titfombe teluhambo lwakhe. Ngatsi nangibona letitfombe, tangenta ngafisa kutsatsa luhambo nami!
20,2	“UMnu. Mabuya uhlale ekhaya, njengami!” kwacabanga Zweli.	Zweli uchumanisa lakwentile nalokwentwe nguMnu. Mabuya. Utiva ancono ngobe yena neMnu. Mabuya bente intfo lefanako ngemaholide.

Kusasa kutawuba lilanga lekucala lekubuyela
esikolweni ngemuva kwemaholide asebusika. Zweli
upholisha ticatfulo takhe. Upakisha nesikhwama
sakhe. Zweli akasakwati kulindza kufika kwelilanga
lakusasa.



Ekuseni, Zweli wagijima waya esikolweni.

Ngalesikhatsi afika, wabona Simone akubomjikeneni.

“Sawubona Zweli! Bewuyephi ngemaholide?” kwabuta Simone.

“Bengihleti ekhaya,” kwaphendvula Zweli. “Wena bewuyephi?”

“Bengiyovakashela babekati wami eMaputo,” kwaphendvula Simone. “Ingabe ukile waya eMaputo?”

“Cha,” kwaphendvula Zweli. “Kunjani?”

“Kunetakhiwo letindze,” kwachaza Simone. “Futsi ebhishi kusedvute! Ngite ngabona ngisho nelwandle!”

“Hhayi bo!” kwababata Zweli. “Nami ngifuna kuya khona.”



Ngemuva kwaloko Tafadzwa weta agijima kubomjikeneni.
“Sanibonani bangani!” kwabingelela Tafadzwa.


“Bewuyephi ngemaholide?” kwabuta Zweli.

“Ngiye eZimbabwe,” kwaphendvula Tafadzwa.

“Ngivakashele gogo wami. Sihambe libanga lelidze ngebhasi. Siye sayobona timphophoma letinkhulu,” kwalandzisa Tafadzwa. “Tibitwa ngekutsi yi-Victoria Falls!”


“Hho!” kwasho Zweli.

“Nami ngifuna kuya khona.”



Ekugcineni, kwafika Ayanda kubomjikeneni, bekameme bhaki lomusha. “Bukani sikhwama sami lesisha lengisitfole eJozi,” kwasho Ayanda ngalengkulu injabulo. “Kunetitolo letinyenti kakhulu lapho!” washo achaza futsi. “Kukhona netitsabatsaba tetitolo!”

“Maye, kuyamangalisa loko!,” kwasho Zweli. “Nami ngifuna kuya khona.”



Ecinisweni Zweli bekangajabuli kakhulu ngekubuyela esikolweni. “Ngifisa sengatsi ngabe ngiye endzaweni letsite lensha,” kwacabanga Zweli. “Kute lapho ngike ngaya khona, bengihleti ekhaya-nje.” Kwakhala insimbi.

Besekusikhatsi Sebuciko Bekubhala. “Lamuhla sitawubhala ngaloko lesikwentile ngesikhatsi semaholide!” kwasho uMnu. Mabuya.

Zweli waphatseka kabi. “Yini lengitawubhala ngayo? Angifuni kubekhona lobona liphepha lami lelitesitunge,” washo acabanga.



UMnu. Mabuya wakhombisa bafundzi kutsi yini lokufanele bayente. Wadvweba sitfombe sakhe ebhodini. Watjela bonkhe bafundzi ngemaholide akhe. “Mine bengihleti ekhaya, futsi ngifundze tincwadzi letinyenti,” kwasho uMnu. Mabuya. “Ngihlanye lematamatisi lamasha engadzeni yami. Ngacitsa sikhatsi nemndeni wami,” kwalandzisa uMnu. Mabuya.

“UMnu. Mabuya uhlale ekhaya, njengami!” kwacabanga Zweli.



Ngemuva kwaloko, uMnu. Mabuya watjela bafundzi kutsi kufanele bacabange ngamaholide abo. Zweli wavala emehlo akhe. Wacabanga ngekuhlala namake wakhe nangekufundza. Wacabanga ngekucitsa ema-awa advweba kanye nadzadzewabo lomncane. Wacabanga ngelilanga umnakabo lomdzala lafika ngalo ekhaya wabese udlala naye ibhola.



Ekugcineni kwekubhala uMnu. Mabuya wabuta kutsi ngubani lofuna kucocela liklasi indzaba yakhe. Sandla saZweli saba sekucala kuphakama.





Kufundza 1

Wayaphi Simone ngemaholide asebusika?

Waya eMaputo.

Wayaphi Tafadzwa ngemaholide asebusika?

Waya eZimbabwe. Waya e-Victoria Falls.

Wayaphi Ayanda ngemaholide asebusika?

Waya eJozi.

Ungachumanisa yini? Ucabanga kutsi ungatva unjani nangabe bonkhe bangani bakho baye etindzaweni letijabulisako ngemaholide?

- Ngicabanga kutsi ngingatva...
- Nangabe bangani bami bahambile, nginga...



Kufundza 2

Zweli ufuna kuyaphi?

Ufuna kuya kuto tonkhe letindzawo bangani bakhe labaye kuto. Bekafuna kuya eMaputo, eZimbabwe, kanye naseJozi.

Yini leyentiwa nguMnu. Mabuya ngeliholide lakhe?

Wahlala ekhaya. Wahlanyela ematamatisi engadzeni yakhe. Wafundza tincwadzi letinyenti. Wacitsa sikhatsi nemndeneni wakhe.

Wativa anjani Zweli ngalesikhatsi atfola kutsi uMnu. Mabuya wahlala ekhaya njengaye?

Wativa ancono. Akamange ative kabi kakhulu ngekuhlala ekhaya, njengathishela wakhe.

Ungachumanisa yini? Zweli wativa anabela tonkhe letintfo letinsha letentiwa bangani bakhe. Ingabe ungacabanga ngesikhatsi wena lowativa unabela kwalabanye ngaso?

- Ngatva nginabela njengaZweli ngalesikhatsi...
- Loko kungikhumbuta ...



INDZABA 3

EMACANDZA AJABU

LASIKREMBULIWE

Ingcikitsi: Siyawenta emaphutsa



Imininingwane yangaphambilini

- Lombhalo uyindzaba lengasilo liciniso.
- Yenteka eNingizimu Afrika.
- Yenteka esikhatsini sanamuhla.
- Lenzaba itawusita bafundzi bakho bavisise kutsi kuphatamiseka kwenta kutsi sente emaphutsa nekutsi kubaluleke ngani kunakisisa nasiniketwe umsebenti.



Lisu lesivisiso: Yenta luhlolo

- Kuyini: Kwenta sincumo sekutsi uyayitsandza yini lendzaba nobe tincumo letitsetfwe balingiswa.
- Kungani sikusebentisa: Kute utakhele wakho umbono ngendzaba futsi uyivisise ngelizinga lelisetulu.
- Kusita njani: Kukusita kutsi ucabange ngemlayeto wendzaba nangaloko lokukholwako ngayo.



Lamanye emaphuzu ekwabela bafundzi bakho

- Ngalesinye sikhatsi kumatima kugcila entfweni letsite nangabe kwenteka lokutsite lokutfokotisako. Bantfu bavame kuphatamiseka nangabe babona noma beva lokutsite lokuhehako, ngisho nalapho betama kwenta umsebenti lobalulekile.
- Nasitsatsa tincumo, kuvame kuba nemiphumela lemhle noma lemibi. Ngalesinye sikhatsi emaphutsa enteka ngobe sinebudedengu.
- Wonkhe umuntfu uyawenta emaphutsa ngalesinye sikhatsi. Ngalesinye sikhatsi emaphutsa siwenta nanoma sititjela kutsi tento tetfu tiyancomeka.
- Lenzaba iphindze isigcugcutele kutsi sicabange ngemaphutsa etfu kute singawaphindzi. Make waJabu kanye nemninitolo bamchushisa kutsi acaphele. Loku kusho kutsi Jabu ukile wakhombisa budedengu ngaphambilini.



Kute usebentise lelisu:

Likhasi nesigaba	Fundza	Tsani
28,2	“Ngiyabonga! Ubophatsa ngekucophelela kute ungawabulali lamacandza,” kwasho umnikati wesitolo. “Ungakhatsateki Babe Gumede, ngihlala ngaso sonkhe sikhatsi ngicaphela,” kwaphendvula Jabu ngalesikhatsi ahamba aphuma emnyango.	Awutsi ngime ngihlole similo saJabu: Ngicabanga kutsi Jabu uhlale njalo aphula tintfo ngobe wonkhe umuntfu umkhumbuta kutsi acophelele. Ngingenta loluhlolo lwekutsi Jabu angahle abe ngumuntfu longanaki.
30,1	“Mhlawumbe angimane ngikhahlele kanye-nje! Make angeke ati!” kwasho Jabu aticabangela ngalesikhatsi agijima aya kubangani bakhe. Wetama kugijima ngekucophelela. Bekangafuni kubulala emacandza!	Awutsi ngime ngihlole similo saJabu: Ngingenta loluhlolo lwekutsi Jabu akanaki. Wonkhe umuntfu kulenzaba bekamkhumbuta kutsi acophelele...kodvwa nyalo, sewugijima nanoma aphetse emacandza! Loko akusiyo intfo lengentiwa ngumuntfu locophelelako!

Make waJabu bekamatasatasa alungiselela kudla kwakusihlwa.

“Ngisayodlala ibhola nebangani bami!” kwamemeta Jabu, agijima aphumela ngaphandle ngemnyango.

“Ake ume!” kwamemeta make waJabu. “Ngicela ungiyele esitolo uyongitsengela idazini yemacandza kanye nelubisi,” kwasho make wakhe ngalesikhatsi amnika luhla lwetintfo letiyotsengwa kanye nemali.

Jabu bekangafuni kuya esitolo, kepha wamoyitela wabese utsi, “Kulungile make!”

“Ngiyabonga! Ngicela ubocaphela ungabulali emacandza,” kwasho make wakhe.


“Ungakhatsateki make, ngihlala ngaso sonkhe sikhatsi ngicaphela,” kwaphendvula Jabu ngesikhatsi ahamba aphuma emnyango.



Jabu waya esitolo. Ngesikhatsi afika lapho, wafundza luhla lwetintfo letitawutsengwa. Watsatsa emacandza kanye nelubisi. Ngemuva kwaloko wahamba wayobhadala. Wanika umnikati wesitolo imali.

“Ngiyabonga! Ubophatsa ngekucopehelela kute ungawabulali lamacandza,” kwasho umnikati wesitolo.

“Ungakhatsateki Babe Gumede, ngihlala ngaso sonkhe sikhatsi ngicaphela,” kwaphendvula Jabu ngalesikhatsi ahamba aphuma emnyango.




Jabu wahamba ngekucophelela lokukhulu ngalesikhatsi asaya ekhaya. Bekangafuni kubulala lamacandza!

Kusenjalo, Jabu weva bangani bakhe bahleka. Wabeva bakhahlela ibhola.

“Masinyane-nje nangicedza kubeka lamacandza nelubisi, ngitawubuya ngitodlala,” kwacabanga Jabu.

Jabu wachubeka wahamba ngekucophelela lokukhulu wacondza ekhaya. Bekangafuni kubulala lamacandza!

Kusenjalo Jabu weva umngani wakhe Sam ambita amemeta. “Jabu, wota sitodlala! Siyakudzinga!”




“Mhlawumbe angimane ngikhahlele kanye-nje! Make angeke ati!” kwasho Jabu aticabangela ngalesikhatsi agijima aya kubangani bakhe. Wetama kugijima ngekucopehelela. Bekangafuni kubulala lamacandza!



Ngalesikhatsi Jabu acala kugijima aya kubangani bakhe, wakhutjwa litje. Ithreyi yemacandza yawela phasi emhlabatsini. Kwagcwala emacandza lafile yonkhe indzawo. Jabu naye watselwa ngemacandza wonkhe umtimba!

“Hhayi bo! Ngitawufike ngitsini kumake?” kwakhala Jabu. “Utawuvele-nje umtjele kutsi bewenta emacandza lasikrembuliwe!” kwasho Sam ahlekisa. Sam naJabu bahleka sikhatsi lesidze.





Kufundza 1

Yini lekufanele ayitsenge esitolo Jabu?

Kufanele atsenge emacandza kanye nelubisi.

Ngubani lowabita Jabu kutsi atodlala ibhola?

Wabitwa ngumngani wakhe Sam kutsi atewudlala.

Kungani Jabu ancuma kutsi adlale ibhola?

- Kungoba umngani wakhe Sam wambita kutsi akete atewudlala.
- Wacabanga kutsi angadlala ibhola ngaphandle kwekubulala emacandza.
- Wacabanga kutsi utawumane ayokhahlela kanye-nje.
- Wacabanga kutsi make wakhe ageke ati!



Kufundza 2

Ucabanga kutsi make waJabu utawutiva anjani uma Jabu afika ekhaya?

Ngicabanga kutsi utawutiva...ngobe...

Ucabanga kutsi Jabu wativa kanjani ngalesikhatsi awisa emacandza? Kungani?

Ngicabanga...ngobe...

Ingabe ucabanga kutsi Jabu ungumuntfu locaphelako? Chaza imphendvulo yakho!

- Cha, ngicabanga kutsi akasiye umuntfu locaphelako. Ngicabanga kanjalo ngobe make wakhe nemnikati wesitolo bamtjela kutsi abocaphela. Kube bebacabanga kutsi uyacaphela, bekungeke kudzingeke kutsi bamkhumbute.
- Cha, ngicabanga kutsi akasiye umuntfu locaphelako ngobe wancuma kuyodlala ibhola ngalesikhatsi asaphetse emacandza!
- Angicabangi kutsi ungumuntfu locaphelako ngobe wagijima waya kubangani bakhe nematicandza!
- Kube Jabu bekangumuntfu locaphelako, ngabe wabeka emacandza ekhaya kucala. Angicabangi kutsi uyacaphela ngobe akacali ngekuya ekhaya – uyahamba uyodlala ibhola.

INDZABA 4

SIVIVINYO SETIBALO LESILULA SALINDENI

Ingcikitsi: Siyawenta emaphutsa



Imininingwane yangaphambilini

- Lombhalo uyindzaba lengasilo liciniso.
- Yenteka eNingizimu Afrika.
- Yenteka esikhatsini sanamuhla.
- Lenzaba itawusita bafundzi bakho bavisise kutsi kutetsembe ube ungatilongi kubangela kutsi sente emaphutsa, nekutsi kufundza kungumphumela wekwenta imetamo nekungaphelelwa ngemandla.



Lisu lesivisiso: Combela Tipheto

- Kuyini: Kucombela tintfo umbhali langatichazi tivele ebaleni, ngekusebentisa tinkhomba letisenzabeni.
- Kungani sikusebentisa: Kute sivisise inchazelo lejulile nemilayeto lefihlakele.
- Kusita njani: Kukusita kutsi wente tipheto njengobe usafundza, uphindze uyivisise kancono lenzaba nebalingswa.



Lamanye emaphuzu ekwabela bafundzi bakho

- Tibalo sifundvo lesidzinga kutsi ulolonge likhono lekutenta kute uphumelele. Loku kusho kutsi nawenta sifundvo setibalo udzinga kutilolonga njalo-nje. Kutilolonga kususita kutsi sikhumbule siphindze sivisise emakhono lamasha.
- Bothishela banika bafundzi umsebenzi wasekhaya ngenhloso yekubasita bafundze. Inhloso yemsebenzi wasekhaya kugcugcutela umfundzi kutsi atilolonge ngaloko lakufundze eklasini.
- Tivivinyo tisetjentiselwa kuhlola kutsi ingabe bafundzi bayakuvisisa labakufundzile noma cha. Sivivinyo sisita thishela abone kutsi yini bafundzi labayatiko kanye nekutsi yini lekusamele bakufundzise.
- Kutetsembe ngalokwecile kungabanga tinkinga ngobe nasicabanga kutsi intfo imelula singacina sesingabuboni bumcoka bekutilolonga nekutilungiselela ngalokwenele, lokubese kusidalela emaphutsa ngesikhatsi sekuvivinywa.



Kute usebentise lelisu:

Likhasi nesigaba	Fundza	Tsani
36,1	Ngalesikhatsi labanye bafundzi babhala letibalo emabhukwini, Lindeni bekaticabangela letinye tintfo.	Ngingacombela ngiphetse ngekutsi Lindeni utitjela kutsi ungumpetha wetibalo ngako-ke akadzingi kutikhandla kanye nekugcila uma thishela afundzisa.
43,1	Ngalesikhatsi Nkkt. Ndlovu akhipha emaphepha esivivinyo, bafundzi beliklasi laLinden babhala ngekushesha tibalo tabo, kepha Lindeni bekabhala kancane. Wacala wajuluka. “Lesivivinyo simatima! Lesivivinyo asisikahle!” watitjela kanjalo aticabangela.	Ngingacombela ngiphetse ngekutsi Lindeni akamange atilolongele ngalokwenele, kungako lesivivinyo simatima kuye.

Ngaso sonkhe sikhatsi Lindeni bekenta kahle
etibalweni. Bekahlala njalo abala. Bekahlanganisa
tinombolo ngenhloko. Bekacabanga kutsi tibalo tilula.

Ngalesikhatsi Nkkt. Ndlovu afundzisa liklasi
ngekususa, Lindeni bekacabanga kutsi kulula.



Nkkt. Ndlovu wabhala tibalo ebhodini. Watjela bonkhe bafundzi eklasini kutsi batibhale phasi. Ngalesikhatsi labanye bafundzi babhala letibalo emabhukwini, Lindeneni bekaticabangela letinye tintfo.

“Ngiyatati mine tibalo. Tibalo tilula. Angidzingi kutilolonga!” kwasho Lindeneni aticabangela.



Ngalesikhatsi Nkkt. Ndlovu achazela bafundzi tibalo, Lindeni bekabuka ngaphandle ngelifasitelo. Bekacabanga ngato tonkhe tintfo lafuna kutenta ngaphandle.

“Ngiyatati mine tibalo. Tibalo tilula. Angidzingi kutilolonga!” Lindeni wacabanga kanjalo.



“Bukani emaphutsa leniwentile futsi nicinisekise kutsi niyavisisa kutsi nisente kuphi siphosiso!” kwasho Nkkt. Ndlovu atjela liklasi. Ngalesikhatsi bafundzi labakanye naLindeneni babuka tiphosiso tabo, yena waphuma waya endlini yangasese.

“Ngiyatati mine tibalo. Tibalo tilula. Angeke ngiwente emaphutsa!” Lindeneni watitjela kanjalo aticabangela.



Nkkt. Ndlovu wakhipha liphepha lekusebentela.
“Yentani letibalo temsebenti wasekhaya! Sifundza ngekutsi sitilolonge kakhulu!” kwasho Nkkt.
Ndlovu atjela liklasi. Lindeni washutseka liphepha lekusebentela esikhwameni sakhe.

“Ngiyatati mine tibalo. Tibalo tilula. Angidzingi kwenta umsebenti wasekhaya!” Lindeni watitjela kanjalo aticabangela.



Ngalobo busuku, ngalesikhatsi bafundzi labakanye naLindeni basebenta ngekutimisela benta tibalo tabo takususa, Lindeni bekabukela mabonakudze.

“Ute yini umsebenti wasekhaya?” kwabuta babe wakhe.

“Cha,” waphendvula Lindeni acamba emanga laluhlata-klaba!

“Ngiyatati mine tibalo. Tibalo tilula. Angidzingi kwenta umsebenti wasekhaya!” Lindeni watitjela kanjalo aticabangela.



Ngakusasa esikolweni, Nkkt. Ndlovu watsatsa umsebenti wasekhaya kubafundzi. “Lindeneni, uphi umsebenti wakho wasekhaya?” wabuta Lindeneni.

“Ngiwukhohlwe ekhaya,” kwaphendvula Lindeneni acamba lamanye futsi emanga laluhlata-klaba. Wachubeka watsi, “Kepha ungatikhatsati – Ngiyatati mine tibalo!” kwasho Lindeneni.

“Lindeneni, wonkhe umuntfu kudzingeka atetayete tibalo! Nobe ngubani angenta kahle kakhulu etibalweni nangabe asebenta ngekutimisela,” kwasho Nkkt. Ndlovu.

Kepha Lindeneni bekangalaleli. “Ngiyatati mine tibalo. Tibalo tilula. Angidzingi kwenta umsebenti wasekhaya!” watitjela kanjalo aticabangela.

Ngemuva kwemalanga lambalwa, Nkkt. Ndlovu wamemetela kutsi kutawuba nesivivinyo ngakusasa eklasini. Lindeneni akaange abe neluvalo.

“Ngiyatati mine tibalo. Tibalo tilula. Ngingaphumelela nanobe ngusiphi sivivinyo!” watitjela kanjalo aticabangelela.



Ngalobo busuku, ngalesikhatsi bafundzi labakanye naLindenib batadishela tibalo tabo takususa, Lindenib bekabukela mabonakudze.

“Nite yini sivivinyo kusasa?” kwabuta babe waLindenib. Wachubeka watsi, “Kufanele ngabe uyatadisha!”

“Sengitadishile,” acamba emanga laluhlata-klaba futsi.

“Kusenjalo, ngiyatati mine tibalo. Tibalo tilula. Angidzingi ngisho nekutadisha!” kwasho yena.



Ngalesikhatsi Nkkt. Ndlovu akhipha emaphepha esivivinyo, bafundzi beliklasi laLinden babhala ngekushesha tibalo tabo, kepha Linden bekabhala kancane. Wacala wajuluka.

“Lesivivinyo simatima! Lesivivinyo asisikahle!” watitjela kanjalo aticabangela.

Ngalesikhatsi Nkkt. Ndlovu amemetela, “Sikhatsi sesiphelile!” Linden bekente ihhafu yetibalo kuphela.





Ngalesikhatsi Nkkt. Ndlovu abuyisa emaphepha esivivinyo ngakusasa, Lindeni bekafeyilile.

Ngemuva kwakuphuma kwesikolwa, ngalesikhatsi bonkhe bafundzi beliklasi laLindeneni sebahambile, Lindeneni wabamba umhlangano naNkkt.. Ndlovu. “Ngente liphutsa Medemu,” wavuma. “Bengicabanga kutsi ngiyatati tibalo. Bengicabanga kutsi tibalo tilula. Angikatilolongi futsi angikatadishi,” washo akhala.

Nkkt. Ndlovu wambukisisa ngekutimisela Lindeneni. Ngemuva kwaloko wabese uyamphendvula watsi, “Singaba bochweephesheshe entfweni letsite kuphela-nje nangabe sitilolonga. Bewuhlala wenta kahle etibalweni ngobe bewenta umsebenti wakho wasekhaya futsi utadisha.”

“Ngetsembisa kutsi ngitawusebenta ngekutimisela etibalweni,” kwasho Lindeneni.

Ngemuva kwalelolonga, Lindeneni wantjintja kucabanga kwakhe, “Ngiyatati tibalo futsi tibalo tilula nangabe uyatadisha!”



Kufundza 1

Yini lebeyentiwa nguLindeneni ngalesikhatsi bafundzi lafundza nabo babhala phasi tibalo tabo?

Bekaticabangela ngaletinye tintfo.

Yini leyentiwa nguLindeneni ngalesikhatsi bafundzi lafundza nabo batadisha tibalo tabo takususa?

Lindeneni bekabukela mabonakudze.

Kungani Lindeneni afeyile sivivinyo sakhe setibalo?

- Kungoba akamange atadishe.
- Kungoba bekacabangaikutsi tibalo tilula.
- Kungoba akatange atilolongele kwenta tibalo eklasini nobe ente umsebenti wakhe wasekhaya.
- Kungoba bekacabanga kutsi uyatati tibalo ngako-ke akadzingi kutsi atadishe.
- Kungoba akatange abe nesikhatsi lesenele sekucedza sivivinyo sakhe.
- Kungoba akamange atilolongele tibalo, ngako-ke bekangakwati kwenta tibalo ngekushesha lokwenele kute aphumelele esivivinyweni sakhe.



Kufundza 2

Nguliphi luphutsa lelentiwa nguLindeneni?

- Akamange atilolongele tibalo nobe atadishe kute atilungiselele sivivinyo. Loko beculiphutsa.
- Wafeyila sivivinyo sakhe. Loko beculiphutsa lelikhulu!

Kulenzaba, yini layifundzile Lindeneni?

Wafundza kutsi uyatati tibalo nekutsi tibalo tiba lula nangabe utilolonga futsi udadisha!

Kungani Lindeneni bekangacabangi kutsi udzinga kutilolongela tibalo takhe?

- Kungoba bekacabanga kutsi uyatati tibalo.
- Kungoba bekacabanga kutsi tibalo tilula.
- Kungoba bekacabanga kutsi angeke ente nobe nguwaphe emaphutsa.
- Kungoba bekacabanga kutsi nangabe ukahle entfweni letsite, awudzingi kutilolonga.
- Kungoba bekangacapheli kutsi kufanele usebente kamatima futsi utilolonge kute utawukwenta kahle entfweni letsite.
- Wenta liphutsa ngekucabanga kutsi kuphiwa entfweni letsite kusho kutsi awudzingi kusebenta kamatima.

INDZABA 5

LLOYD, MPETHA

WEKUDANSA

Ingcikitsi: Siyadansa



Imininingwane yangaphambilini

- Lombhalo uyindzaba lengasilo liciniso.
- Yenteka e-Ghana.
- Yenteka esikhatsini sakamuva lesengcile
- Lenzaba itawusita bafundzi bakho bavisise kutsi kulandzela liphupho lakho kungakuholela emphumelelweni kanye nekutsi bantfu labanetiphiwo bangabasita njani labanye kutsi bafeze emaphupho abo.



Iisu lesivisiso: Yenta Luhlo

- Kuyini: Kwenta sincumo sekutsi uyayitsandza yini lenzaba nobe tincumo letitsetfwe balingiswa.
- Kungani sikusebentisa: Kute utakhele wakho umbono ngendzaba futsi uyivisise ngelizinga lelisetulu.
- Kusita njani: Kukusita kutsi ucabange ngemlayeto wendzaba nangaloko lokukholwako ngayo.



Lamanye emaphuzu ekwabela bafundzi bakho

- Kugiya akugcini ngekuba yindlela yekutitfokotisa kuphela kepha kuphindze kube luhlobo lwebuciko. Bantfu bayagiya kute bakhombise imiva yabo, bateke tindzaba, kanye nekujabulisa tihlewe. Kugiya kungentiwa enkhundleni lesiteji noma kucoshwe njengevidiyo.
- Labanye bantfu bakholelwa kutsi leminy e imisebenti ibaluleke kundlula leminy e. Sibonelo, ngalesinye sikhatsi bantfu bacabanga kutsi tibalo noma isayensi kubaluleke kwendlula kugiya kanye naletinye tinhlobo tebuciko.
- Tikhundla tekuchumana tisetjentiselwa kwabelana ngetitfombe nangemavidiyo nesihlewe sebantfu. Tikhundla tekuchumana njengabo-Instagram tivumela bantfu kutsi babelane ngemavidiyo nangetitfombe nalabanye bantfu emhlabeni jikelele.
- “Kutfola ludvumo ube sematseni” kusho kutsi bantfu labanyenti babukela baphindze babelane ngevidiyo noma sitfombe noma ngaleminy e imisebenti yakho nebantfu labanyenti masinyane.



Kute usebentise lelisu:

Likhasi nesigaba	Fundza	Tsani
50,4	Laud wativa acindzetelwa kutsi ayekele kudansa, kepha bekati kutsi angeke aphile ngekujabula ngaphandle kwekudansa. Wancuma kukwenta kube ngumsebenti wekuphila kwakhe kute antjintje umbono webantfu mayelana nekudansa.	Awutsi ngime ngihlole similo sa-Laud: Ngicabanga kutsi Laud utimisele futsi utetsembile, ngobe akalilahli lithawula ngalokucondzene naloko lakutsandzako nanoma labanye bamcedza emandla.
53, 1	Nanoma kunjalo, wabona kutsi akafuni-nje nekumane adanse – bekafuna kusita labanye badansi labasebancane kutsi nabo bafeze emaphupho abo.	Awutsi ngime ngihlole similo sa-Laud: Ngicabanga kutsi Laud unesandla sekuphana futsi uyakhatsalelana, ngobe usebentisa imphumelelo yakhe kute atfutfukise badansi labasebancane.

Kudansa bekwenta Laud Konadu njalo ative ajabula.
Bekahamba adansa nangabe aya esikolweni. Lilanga
lonkhe esikolweni tinyawo takhe betidansa ngaphasi
kwelideski lakhe. Bekadansa ngisho nobe agijima
enkhundleni yebhola.

Nobe nini nangabe
Laud adansa,
bekamoyitela.



Kepha ngalesikhatsi Laud asemncane, bantfu bebangamkhutsati kutsi adanse.

“Laud – bantfu batawucabanga kutsi usilima nangabe udansa ngaso sonkhe sikhatsi,” kwasho umndeni wakhe.

“Laud – kudansa akuhlonishwa! Kufanele ukhetse kwenta lenye intfo!” kwasho thishela wakhe.

“Laud – ibhola ibaluleke kakhulu kunekudansa!” kwasho bangani bakhe. Laud wativa acindzetelwa kutsi ayekele kudansa, kepha bekati kutsi angeke aphile ngekujabula ngaphandle kwekudansa. Wancuma kukwenta kube ngumsebenti wekuphila kwakhe kute antjintje umbono webantfu mayelana nekudansa.



Laud wancuma kwakha indlela yakhe yekudansa. Bekacitsa ema-awa etinkhundleni tekuchumana abukela kudansa lokwehlukene kwalo lonkhe livekati lase-Afrika bese ukuhlanganisa ndzawonye nendlela yakhe yekudansa. Ngemuva kwaloko, wacela umngani kutsi arekhode indlela yakhe yekudansa asebentisa lucingo lwakhe. Ekugcineni, wafaka ividiyo yakhe ku-Instagram.



Ividiyo ya-Laud yasabalala masinyane.
Tinkhulungwane tebantfu kuwo wonkhe umhlaba
tabukela Laud adansa.

“Kuyamangalisa!” kwasho lomunye umuntfu.


“Usihlabani!” kwabhala lomunye umuntfu.

“Levidiyo ingibusisile lamuhla!” kwasho umuntfu
wesitsatfu.

Kusukela ngalelo langa kuye embili, Laud watiwa
ngelibito lelinemandla, “Lloyd, mpetha wekudansa”.



Lloyd, mpetha wekudansa bekakutsandza kunakwa labekutfola etinkhundleni tekuchumana lafaka kuto emavidiyo akhe ekudansa. Nanoma kunjalo, wabona kutsi akafuni-nje ngekumane adanse – bekafuna kusita labanye badansi labasebancane kutsi nabo bafeze emaphupho abo. Lloyd, mpetha wekudansa wacala kufaka tifundvo tekufundzisa tibukeli takhe indlela yakhe yekudansa.



Ngemuva kwaloko, Lloyd, mpetha wekudansa wahlala phasi nebangani bakhe lababili.

“Ngalesikhatsi ngicala kudansa, bengicabanga kuphela ngekuvela etiteji letinkhulu. Kepha nyalo, lokukhulu lengicabanga ngako kugcugcutela bantfu labasha base-Ghana,” kwasho yena.

Bandzawonye, bavula sikolwa sekudansa, i-Dance with a Purpose Academy. Basibita ngekutsi yi-DWP ngekufishanisa.



Lloyd, mpetha wekudansa kanye nebangani bakhe bebefuna kucinisekisa kutsi i-DWP ivuleleka kunobe ngubani umdansi lomusha, lonesiphiwo.


Ngako-ke, bancuma kukhokhela tonkhe tindleko temdansi lonesiphiwo lesanele kutsi angemukeleka kulesikolwa.



Ngalelinye lilanga, Lloyd, mpetha wekudansa bekahlola i-Instagram ngemuva kwekufaka tifundvo tekudansa letinsha. Wabona ividiyo lefakwe ngumfana losemusha lobitwa ngekutsi ngu-Hubert. Hubert bekalandzela tonkhe tinyatselo tekudansa lebetisetifundvweni. Kusenjalo, bekabonakalisa kuba nelikhono lekusungula kanye nesiphiwo. Laud wancuma kutsi Hubert bekumfanela kahle kuya e-DWP. Ngalesikhatsi Lloyd, mpetha wekudansa ahlangana na-Hubert, bahlala bakhuluma. Laud watfola kutsi Hubert bekaneminyaka-nje le-10 kuphela budzala. Walahlekelwa ngibo bobabili batali bakhe asesemncane kakhulu. Lloyd, mpetha wekudansa wenta lisu lekutsi Hubert aye e-Accra kute ayofundza e-DWP. Wahlelela Hubert sikolwa, kudla kanye nendlu yekuhlala.



“Leli liphupho lami,” Lloyd, mpetha wekudansa watjela umngani wakhe, “kusita ngekwakha situkulwane sebadansi lababochwepheshe – nanobe banemali lencane kangakanani.”



Lloyd, mpetha wekudansa wacala kwenta imihlanganosikolwa yamahhala wayentela labasha kuyo yonkhe i-Ghana ngenhloso yekusabalalisa injabulo kanye nekuntjintja imibono yebantfu mayelana nekudansa. Njengobe ahamba yonkhe i-Ghana, uchubeka nekubuka badansi labasebasha, labanelikhono lekusungula njenga-Hubert kutsi batawufundza esikolweni sakhe sekudansa.





Kufundza 1

Watiwa ngaliphi libito lekudlala Laud ngemuva kwekufaka ividiyo yakhe etinkhundleni tekuchumau-a?

Bambita ngekutsi ngu-Lloyd, mpetha wekudansa.

Bekangubani Hubert?

- Hubert bekangumfundzi e-DWP.
- Hubert bekangumdansi lowacala kubonwa ngu-Laud ku-Instagram.

Kungani Laud wancuma kuvula i-DWP?

- Kungobe bekafuna kusita insha yase-Ghana kutsi ibe badansi.
- Kungobe bekafuna kuntjintja imibono yalabanye bantfu mayelana nekudansa – angatenteli yena-nje kuphela.
- Kungobe bekafuna kufundzisa kudansa kunsha yase-Ghana.
- Kungobe bekumsita afeze umgomo wakhe wekuntjintja imibono yebantfu ngekudansa.



Kufundza 2

Beliyini ligama lesikolwa sekudansa lesavulwa nguLaud?

Besibitwa ngekutsi yi-Dance with a Purpose Academy (i-DWP ngekufishanisa).

Ucabangani ngekuba ngumdansi?

Umbono wami ngekudansa...

Kungani Laud bekafuna kuntjintja imibono yebantfu ngekudansa?

- Kungobe bekafuna bantfu labasha bakwati kuphupha ngekutsi babe badansi.
- Kungobe bantfu bebangamkhutsati ngalesikhatsi asemncane – bekafuna kubelula kulabanye bantfu.
- Kungobe bekatsandza kudansa, futsi bekafuna bantfu babone kubaluleka kwekudansa.
- Kungobe bekafuna bantfu labasha bakwati kufeza emaphupho abo ekuba badansi.



INDZABA 6

MUSA MOTH: UMDANSI

LOPHIKISANA NEMANDLA

EKUDVONSELA PHASI

Ingcikitsi: Siyadansa



Imininingwane yangaphambilini

- Lombhalo uyindzaba leliciniso lelinongiwe.
- Yenteka eNingizimu Afrika.
- Yenteka esikhatsini sakamuva lesengcile
- Lenzaba itawusita bafundzi bakho bavisise kutsi kucinisela, buciko, kanye nekutimisela kungasita bantfu bancobe bumatima babese bafeza emaphupho abo.



Lisu lesivisiso: Yenta luhlolo

- Kuyini: Kwenta sincumo sekutsi uyayitsandza yini lenzaba nobe tincumo letitsetfwe balingiswa.
- Kungani sikusebentisa: Kute utakhele wakho umbono ngendzaba futsi uyivisise ngelizinga lelisetulu.
- Kusita njani: Kukusita kutsi ucabange ngemlayeto wendzaba nangaloko lokukholwako ngayo.



Lamanye emaphuzu ekwabela bafundzi bakho

- Bantfu banemaphupho lantjintjako ngekuhamba kwesikhatsi. Bantfu bangaba nemaphupho lahlukile nabasebantfwana, futsi ngalesinye sikhatsi lawo maphupho angagucuka ngenca yetimo temphilo.
- Ngalesinye sikhatsi bantfu baphatfwa kugula lokumatima noma balimale kabuhlungu. Umsebenti wabodokotela kuncedza labantfu ngekubapopola nangetindlela tekubalapha letifaka ekhatsi kubanika imitsi. Lokunye kugula kungatsikameta indlela umtimba losebenta ngayo.
- Bantfu labaphila nekukhubateka bangasebentisa emathulusi kanye nekutitayeta ngekutifundzisa kunyakata kute babe yincenye yalokwentiwa emphakatsini. Labanye bantfu labaphila nekukhubateka basebentisa tinsita letifana netinsimbi tekuhamba nome tincolatitulo. Labanye babo bayakhona kutifundzisa ngekutitayela futsi babe yincenye yako konkhe lokwentiwa emphakatsini. Kantsi-ke labanye bagucula indlela yekwenta tintfo bagcine nabo sebayincenye yako konkhe lokwenteka emphakatsini.
- Bantfu labaphila nekukhubateka banemakhono lakhetsekile futsi bangenta tintfo letimangalisako, bafeze tinhloso tabo, baphindze babe sibani selitsembe kulabanye bantfu ngenca yalamakhono abo lakhetskile.



Kute usebentise lelisu:

Likhasi nesigaba	Fundza	Tsani
65,2	Musa watsatsa sincumo lebesimatima sekutsi umlente wakhe ujutjwe kute kuvinjwe lomdlavuta ungachubeki nekwandza.	Awutsi ngime ngihlole similo saMusa: Ngicabanga kutsi Musa unesibindzi futsi uyatimisela, ngobe utsatsa sincumo lesimatima kute asindzise imphilo yakhe nanoma intjintja likusasa lakhe.
69,1	Wabona kutsi kudansa ngelunyawo lunye bekusho kusebenta lokuphikisana nemandla ladvonsela phasi, ngemandla nangekusiphalata. Kuko konkhe kutilolonga kwakhe, wasebentela kwakha budlelwano lobuhle nemandla ekudvonsela phasi.	Awutsi ngime ngihlole similo saMusa: Ngicabanga kutsi Musa ungumuntfu lotimisele nalosebenta ngekutikhandla kakhulu, ngobe akalilahli lithawula. Musa utifundzisa kwenta ngendlela lelingene umtimba wakhe bese uchubeka ngekutfutukisa kudansa kwakhe nanoma abukene nebumatima.

Lena yindzaba lekhuluma ngaMusa Motha,
longumdansi lovelele waseNingizimu Afrika.



Ngalesikhatsi Musa asesemncane, akamange acabange kutsi uyoke abe ngumdansi. Liphupho lakhe bekukuba ngumpetha ebholeni letinyawo. Bekatsandza kugijima ehla enyuka nenkhundla, aveyisa futsi akhahlela ibhola yetinyawo.

Kepha ngalelinye lilanga, ngalesikhatsi aneminyaka leyimfica budzala, kukhona lowamkhahlela lidvolo emdlalweni webhola yetinyawo. Njalo ebusuku, emaviki lamanyenti ngemva kwekulimala, lidvolo lakhe belivuvuka. Batali bakhe babona kutsi akusiko kulimala lidvolo lokutayelekile, base-ke bancuma kumyisa esibhedlela.



Etinyangeni letisitfupha, kute lobekabona kutsi yini leyonakele edvolweni laMusa. Wahamba tibhedlela letinyenti. Wahlangana nabodokotela labanyenti. Bampopola emahlandla lamanyenti benta luhlolo, kepha bebangatfoli kutsi yini lena beyenta kutsi lidvolo lakhe livuvuke.

Ekugcineni, lomunye wabodokotela baMusa wancuma kutsi kumhlindza kancane, lokubitwa ngekutsi yibhayophsi, lapho khona kutsatfwa incenye lencane yeticubu takho. Yatsi nayibuya imiphumela, yaveta kutsi Musa uphetfwe luhlobo lolutsite lwemdlavuta wematsambo lolubitwa ngeSilumbi ngekutsi pheceleti yi-Osteosarcoma. Musa watsatsa sincumo lebesimatima sekutsi umlente wakhe ujutjwe kute kuvinjwe lomdlavuta ungachubeki nekwandza.




Kujutjwa kwemlente waMusa bekusho kutsi sewute umdlavuta. Nanoma kunjalo, bekusho futsi kutsi liphupho lakhe lekuba ngumdlali webhola yetinyawo beseliphelile. Bekangasakhoni kugijima ehle enyuka nenkhundla, nobe aveyise futsi akhahlele ibhola. Kepha, Musa wancuma kutsi agcile kuto tonkhe tintfo umtimba lowehlukile lebewukwati kutenta.



Inhlangano lebitwa ngekutsi “yiFeza Liphupho (Reach for a Dream),” lesita bantfwana labaphetfwe tifo letikhinyabeta imphilo, yatsengela Musa sidlalamculo. Musa wacala kutsandza kakhulu umculo. Ekutsandzeni kwakhe umculo, Musa watfola kutsi kunaletinye tindlela tekunyakatisa umtimba wakhe. Wacala watilolonga kudansa.



Ngemnyaka we-2017, Musa wenta luhlolokhono lwemdanso Enkampanini Yekudansa iVuyani. Watsatfwa ngelikhono lakhe lelihle lekudansa, nangendlela lehlukile labekayiletsa esiteji.



Eluceceshweni lwaMusa eNkampani Yekudansa iVuyani, bekunguye kuphela umdansi lowehlukile. Nanoma kunjalo Musa bekayemukela yonkhe insayeya. Wabona kutsi kudansa ngelunyawo lunye bekusho kusebenta lokuphikisana nemandla ladvonsela phasi, ngemandla nangekusiphalata. Kuko konkhe kutilolonga kwakhe, wasebentela kwakha budlelwano lobuhle nemandla ekudvonsela phasi.



Emuva kwekutilolonga, Musa waba ngulomunye umholi webadansi eNkampanini Yekudansa iVuyani. Kepha-ke, Musa kusamele asebente kamatima onkhe emalanga. Akusimalula kubahleli bemdanso kwakha inchubo yemdanso lotocondzana netindlela taMusa tekudansa. Kumele kutsi Musa asite ngekutsi ajwayele tindlela tekudansa talabanemitimba lengakakhubateki kute imlungele naye.



Uma Musa adlala etiteji letinkhulu, bantfu labanyenti bayamangala kubona umdansi longuchwepheshe adansa ngetindvuku tekuhamba talabanekukhubateka. Bantfu baphuma bamangele futsi bagcugcutelekile ngebuhle nekubusiseka kwekudansa kwakhe.

Musa uyatigcugcutela tibukeli takhe kutsi ticabange ngebantfu labanemakhono lahlukene. Kuphumelela kwakhe esiteji kwenta kutsi tingcondvo tebantfu tikhule tibuye tisuse umuva wekubukela phasi labanye bantfu! Ukhombisa bantfu kutsi imitimba lehlukile iyakwati kucina futsi ibe mihle.



Ngekudansa kwakhe, Musa Motha ufuna kukhomba sive kutsi kute lokungenteki. Ngalesinye sikhatsi Musa usebenta kamatima udzimate umtimba wakhe uve buhlungu. Kepha, uyawutfole umdlandla wekutsi asukume achubeke nekudansa.





Kufundza 1

Bekaneminyaka lemingaki budzala Musa uma kutfolwa kutsi unemdlavuta?

Bekaneminyaka leyimfica.

Yini lancuma kuyenta Musa esikhundleni sekudlala ibhola yetinyawo?

Wancuma kuba ngumdansi.

Kungani Musa Motha waba ngumdansi?

- Kungoba bekangeke asakwati kuba ngumdlali webhola yetinyawo.
- Kungoba watsandza umculo.
- Kungoba umculo wamsita kutsi abone kutsi bekunaletinye tindlela tekunyakatisa umtimba wakhe.
- Kungoba bekafuna kubukana nato tonkhe tintfo umtimba wakhe longakwenta.
- Kungoba watilolonga wadzimate watsatfwa eNkampanini Yekudansa iVuyani.



Kufundza 2

Ingabe utiva ugugcugcutelekile ngaMusa Motha? Chaza.

Ngitiva ngigugcugcutelekile ngaMusa Motha ngobe...

Uhluke kanjani Musa kulabanye badansi.

Uhlukile kulabanye badansi ngobe unemlente munye kuphela.

Kungani singatsi Musa Motha ungumuntfu lotimiselako?

- Kungoba watfola intfo lengentiwa ngumtimba wakhe emva kwekutsi umlente wakhe ujutjiwe.
- Kungoba kungenteka kutsi wadvumala ngekutsi angeke asaba ngumdlali webhola yetinyawo, kepha wancuma kutfola langakwenta!
- Kungoba watimisela etintfweni lebetingentiwa ngumtimba wakhe.
- Kungoba wasebenta kamatima kute abe ngumdansi.
- Kungoba kudansa kumatima kumuntfu lonemlente munye, manje Musa kumele asebente ngalokuphindziwe. Kephahle uyeyetama ngako konkhe!
- Kungoba Musa ungumholi wemdanso. Kumele asebente kamatima kute abe ngulomunye webadansi labahle.
- Kungoba bantfu kulesinye sikhatsi bangacabanga tintfo letimbi ngebantfu labahlukene ngekukhubateke, kepha Musa akumange avumele leto tinkholelo timvimbe kutsi abe ngumdansi lomkhulu.
- Kungoba Musa usebenta ngekuvumelana nebadansi kute batokhona tindlela takhe tekudansa.

Musa Motha: <https://youtu.be/0E4COuKljAM>



INDZABA 7

EMAHLENGETFWA

AYASINDZISA

Ingcikitsi: Sitfola lusito



Imininingwane yangaphambilini

- Lombhalo uyindzaba lelaciniso lelinongiwe.
- Yenteka esikhatsini sakamuva lesengcile..
- Yenteka e-California, eMelika.
- Lenzaba itawusita bafundzi bakho bavisise kutsi ngaletinye tikhatsi lusito lungavela etindzaweni letingakalindzeleki, nekutsi kubalulekile kutsi singaphelelwa litsemba.



Lisu lesivisiso: Bona ngemehlo engcondvo

- Kuyini: Kwakha sitfombemcondvo saloko lokwentekako kulenzaba.
- Kungani sikusebentisa: Kute sente lenzaba iphile futsi ibe mnandzi kakhulu.
- Kusita njani: Kukusita kutsi uvisise kutsi banjani balingiswa netindzawo lekubhalwe ngato futsi kwenta lenzaba icace kakhulu.



Lamanye emaphuzu ekwabela bafundzi bakho


- Emahlengetfwa tilwane letimunyisa bantwana bato lubisi, lokusho kutsi bantfu, tinja kanye nawo emahlengetfwa afakwa ngaphasi kwelicembu linye letintfo letiphilako. Emahlengetfwa awasiwo tinhlanti. Sibonelo, emahlengetfwa aphefumula umoya ngemaphaphu njengebantfu - awakhoni kuphefumula nakangekhatsi emantini njengetinhlanti. Emahlengetfwa kumele avele ngetulu kwemanti kute akhone kuphefumula.
- Emahlengetfwa nguletinye tetilwane taselwandle letikhaliphe kakhulu emcondvweni futsi anelikhono lekwakha bungani. Kunetindzaba letinyenti letibikiwe lapho emahlengetfwa abonakale avikela bantfu labebahlaselwa boshaka. Emahlengetfwa akhona kubavikela labantfu ngekubhukusha ngakubo abatungelete.
- Kugwedla emagagas noma kuntjweza ngumdlalo loyindlela yekutifokotisa elwandle. Kugwedla emagagasi ngumdlalo lapho umuntfu ema noma alala esikebheni lesisalibhodi lelikhetsekile abese uhamba etikwemagagasi elwandle. Bagwedli bemagagasi basebentisa emandla abo ekusimama kanye nelikhono lekuhlala esikebheni lesisalibhodi uma emagagasi agijima ngemandla acondze elusentseni lwelwandle.
- Nakulinganiswa, cishe bagwedli bemagagasi labangu-15 kuya ku-30 bahlaselwa boshaka ngemnyaka. Kuhlaselwa kwebagwedli bemagagasi lokunyenti kwako kwenteka eMelika, kulandzelwe kuse-Ositreliya kugcine eNingizimu Afrika.




Kute usebentise lelisu:

Likhasi nesigaba	Fundza	Tsani
81,1	Ngekucwabita kweliso, kwaba nentfo leshayisa ngaphasi kwebhodi yekuntjweza ya-Todd! Todd nebhodi yakhe yekuntjweza bandiza baya etulu emoyeni emamitha lasihlanu. Watsi uma abuya emoyeni wawela ekhatsi emantini, Todd wacala washwaywa luvalo. “Kufanele kutsi kunashaka lapha!” wacabanga. Inhlitiyo yakhe beyishaya ngemandla.	Nakanjani loku kuyesabisa ku-Todd. Ngibubona ngemehlo engcondvo buso ba-Todd bugcwele kwesaba nakaphoswa emoyeni.
84,1	Nyalo loshaka abambe umlente wa-Todd emkhatsini wematingo akhe lakhali phe njengelisaha, Todd wasebentisa lolu lolunye lunyawo kwetama kukhahlela shaka kakhulu ngendlela bekangakhona ngayo. Kepha loshaka wamubamba wacinisa.	Ngimbona ngemehlo engcondvo Todd anyakata futsi akhahlela atsi wetama kucoshela loshaka khashane. Nakanjani Todd utiva esaba kutsi loshaka utamcamula lunyawo lwakho lonkhe.


Lenzaba isuselwe endzabeni leyenteka mbamba yenhlabi lenguchwepheshe, pheceleti umgwedli wemagagasi ngebhodi lekhetsekile lesasikebhe, Todd Endris. Lenzaba yenteka e-Monterey Bay, e-California eMelika.



Ngalelinye lilanga ekuseni ngeNgc bekunkhungu. Todd wahamba waya ebhishi. Wavala ziphu wesudu yakhe yekungena emantini wabese utsatsa ibhodi yakhe yekuntjweza emantini, njengobe bekenta onkhe emalanga ekuseni. Ngalesikhatsi angena emantini, wabona emahlengetfwa lasitfupha adlala emagagasini. “Loku akukatayeleki!” washo acabanga. Wema sikhashana wawabukela futsi wawadvumisa.




Ngemuva kwaloko, Todd wabese ugibela ibhodi yakhe yekuntjweza wacala kuyigwedla waya lapho kusuka khona emagagasi. Watitsela etikweligagasi lelikhulu lebelita, wagwedla kute asuke kulo wabese utitsela kulelinye, njengalokuvamile. “Kube lilanga lelimnandzi lekuntjweza lamuhla!” kwacabanga Todd. “Phangisa!” wamemeta umngani wakhe Brian, lobekasebhishi agcoka timphahla takhe tekuntjweza.



Todd walala etikwebhodi yakhe yekuntjweza wengca emagagasini asalindzele Brian kutsi abe kanye naye.



Ngekucwabita kweliso, kwaba nentfo leshayisa ngaphasi kwebhodi yekuntjweza ya-Todd! Todd nebhodi yakhe yekuntjweza bandiza baya etulu emoyeni emamitha lasihlanu. Watsi uma abuya emoyeni wawela ekhatsi emantini, Todd wacala washaywa luvalo. “Kufanele kutsi kunashaka lapha!” wacabanga. Inhlitiyo yakhe beyishaya ngemandla.



Todd ngekwetfuka nekutatatela wetama ngemandla kudvonsa intsambo yakhe kute kutsi advonse ibhodi yakhe yekuntjweza ite kuye. Wagibela ibhodi yakhe yekuntjweza wabese ugwedla ngekushesha lokukhulu waya elusentseni lwelwandle. Asagwedla, bekabukisisa timphiko tashaka emantini.




Kwatsi kusenjalo, Todd waphindze futsi washayeka, kakhulu kunakucala. Ngalesikhatsi Todd awela emantini kwesibili, shaka lomkhulu lomhlophe wafaka ematinyo akhe emhlane wakhe.


Emanti agucuka aba bovu-tju ingati. Loshaka wanikina Todd wamyisa embili nasemuva, etulu naphasi. Ngalesikhatsi avela ngetulu kwemanti, Todd wakhala futsi wamemeta. “Inyandzaleyo! Inyandzaleyo!” Ngalesikhatsi shaka amdvosa ambuyisela ngaphasi kwemanti, Todd washaya likhala lashaka aphindzelela, etama kumenta kutsi umyekele.



Loshaka wawuyekela umhlane wa-Todd, kepha kwaba sikhashana lesincane. Ngemva kwaloko, loshaka wabamba umlente wa-Todd – kwaba sengatsi ufuna kuwugwinya wonkhe! Nyalo loshaka bekabambe umlente wa-Todd emkhatsini wematingo akhe lakhaliphe njengelisaha, Todd wasebentisa lolu lolunye lunyawo kwetama kukhahlela shaka kakhulu ngendlela bekangakhona ngayo. Kepha loshaka wambamba wacinisa.



Bekunekukhaphaka kwemanti lokunyenti kakhulu kangangekutsi Todd akamange awabone emahlengetfwa labebhukusha eceleni kwakhe amtungeletile aphindze futsi eca ngetulu kwakhe. Weva-nje shaka sewumyekela. Todd wetama kungacwili emantini. Ngekushesha wafuna libhodi lakhe lekuntjweza lapho futsi atilungiselela kulunywa kwesitsatfu.



Ngalesikhatsi Todd afuna, wacaphela kutsi lamahlengetfwa lamahle lasitfupha asamtungeletile. Bewashaya emanti ngemisila yawo, atfusa, futsi asabisa loshaka lomkhulu lomhlophe. Todd wabamba ibhodi yakhe yekuntjweza.



Kusenjalo Todd weva livi la-Brian. “Phangisa! Gibela ebhodini yakho yekuntjweza!” kwamemeta Brian etfukile. Emanti bekasagcwele ingati. Ngalesikhatsi Brian asita Todd, amdvosela elusentseni, bekabuka njalo-nje timphiko emantini. “Inyandzaleyo!” kwamemeta Brian acela lusito kubantfu labebaselusentseni.



Ekugcineni Todd weva ibhodi yakhe yekuntjweza itsintsa sihlabatsi. Bekasabuyele elusentseni. “Kulungile! Utawuba kahle!” kwasho Brian. Todd akamange akholwe kutsi ngulamahlengetfwa latitsandzela kudlala lasindzise imphilo yakhe.





Kufundza 1

Shaka wamluma kuphi Todd?

Shaka wacala ngekuluma Todd emhlana wabese umluma emlenteni.

Ngubani lowasindzisa Todd kushaka?

Emahlengetfwa latitsandzela kudlala asindzisa Todd ngekwetfusa, acoshe shaka.

Kungani lendzaba yesabisa?

- Kungoba kunashaka kulendzaba kantsi boshaka bayesabisa.
- Kungoba Todd walunywa ngushaka futsi bekunengati emantini.
- Kungoba Todd bekayedvwa-vo ngalesikhatsi alunywa ngushaka.
- Kungoba shaka wamluma etindzaweni letinyenti – shaka bekabuya kanyenti kuye.
- Kungoba asati kutsi Todd utawuphila yini nobe utawubulawa ngushaka kwate kwaba sekugcineni kwendzaba.



Kufundza 2

Weta nini Brian emantini kutewusita Todd?

Weta kutewusita Todd ngemuva kwekutsi emahlengetfwa atfuse aphindze acoshe shaka.

Bona ngemehlo engcondvo kuhlasela kwashaka lokwenteka endzabeni. Yini locabanga kutsi yesabisa kakhulu nyalo?

Ngicabanga kutsi lokwesabisa kakhulu nyalo ngulokwenteki ngalesikhatsi...

Kungani Brian umngani wa-Todd angamange weta kutomsita?


- Kungoba bekacabanga kutsi naye angahlaselwa ngushaka.
- Kungoba kuhlaselwa kwenteka emantini futsi bekungelula kubona lokwentekako.
- Kungoba bekutawuba matima kutfofa Todd emantini lanengati.
- Kungoba shaka lomkhulu lomhlophe mkhulu kakhulu kantsi futsi angahlasela kalula bantfu lababili.
- Mhlawumbe kungoba Brian bekasaba kakhulu kungena emantini ngalesikhatsi abona shaka.



INDZABA 8

MUNENE UTFOLA LUSITO

Ingcikitsi: Sitfola lusito



Imininingwane yangaphambilini

- Lombhalo uyindzaba lengasilo liciniso.
- Yenteka eNingizimu Afrika.
- Yenteka esikhatsini sanamuhla.
- Lenzaba itawusita bafundzi bakho bavisise kutsi kumatima kakhulu kululama nawushonelwe ngumuntfu lomtsandzako. Kubalulekile kutsi sibabeketelele bantfu labalilako, futsi ngalesinye sikhatsi kudzingeka batfole lusito lwabodokotela.



Lisu lesivisiso: Combela tiphetfo

- Kuyini: Kucombela tintfo umbhali langatichazi tivele ebaleni, ngekusebentisa tinkhomba letisendzabeni.
- Kungani sikusebentisa: Kute sivisise inchazelo lejulile nemilayeto lefihlakele.
- Kusita njani: Kukusita kutsi wente tiphetfo njengobe usafundza, uphindze uyivisise kancono lenzaba nebalingswa.



Lamanye emaphuzu ekwabela bafundzi bakho


- Kubalulekile kusita bantfwana lababukene nelusizi lwekulahlekelwa batali, bogogo nabomkhulu, noma banakekeli babo.
- Lindzela lomntfwana loselusizini kutsi 'adzedzese' noma ahluphe. Tama kumupha ematfuba ekutsi abhodle mayelana nendlela lativa ngayo ngekucocisana naye, kumsita advwebe titfombe noma abhale ngemiva yakhe, ngisho nekwenta umdlalo lonciphisa intfukutselo ngekubandzakanya umtimba wonkhe lofana nekugwedla ushaye sibhakela.
- Chubekani naloko lenicale kukwenta. Kwenta tintfo ngekuphindzaphindza nangesikhatsi lesifanako kwenta bantfwana bative baphephile.
- Kubalulekile kubeketela nawubukene nesimo semntfwana loselusizini. Bantfwana labakulesimo kumele bavungyelwe kutsi bakhale futsi balalele baphindze bavisise imiva yabo kancane kancane.



Kute usebentise lelisu:

Likhasi nesigaba	Fundza	Tsani
94,4	Kepha kakhulu, bekakhumbula umsindvo wekuhleka kakhulu kwagogo wakhe. Munene bekafuna kulala lilanga lonkhe. Bekativa adzinwe kakhulu kutsi angavuka embhedzeni.	Ngingacombela ngiphetse ngekutsi Munene akativa kahle, ngobe ufuna kuhlala embhedzeni lilanga lonkhe.
97,1	“Ngikuphekele kudla kwakho lokutsandzako kwakusihlwa!” kwasho Anti Bukiwe, anika Munene isendwishi yeshizi letfoswe yafohlotela. “Ngiyabonga, kepha angikalambi,” kwasho Munene, akhweshisela eceleni lipuleti lakhe.	Ngingacombela ngiphetse ngekutsi Munene akativa kahle, ngobe akafuni kudla lutfo, ngisho nekudla lakutsandza kakhulu.

Ngemuva kwekushona kwagogo waMunene, wahamba wayohlala na-Anti wakhe Bukiwe eMamelodi – ekudzeni nasekhaya kubo eXigalo.



Nafika ekhaya ka-Anti wakhe Bukiwe, kute lebekubonakala kuhamba kahle. Indlu beyibonakala iyinkhulu futsi ite lutfo.

Bekakhumbula imisindvo yetinyoni tikhala ngaphandle kwelifasitela lakhe ekuseni.

Bekakhumbula umsindvo wekuvula nekuvalwa kwesivalo lesidzala lebesinelufa.

Kepha kakhulu, bekakhumbula umsindvo wekuhleka kakhulu kwagogo wakhe. Munene bekafuna kulala lilanga lonkhe. Bekativa adzinwe kakhulu kutsi angavuka embhedzeni.



Watsi uma afika eklasini lakhe lelisha, kute lebekubonakala kukahle. Leliklasi belibukeka limnyama futsi libandza.

Nasesikolweni bekakhumbula imisindvo yekubhonsa kwetinkhomo ngaphandle kwelifasitelo.

Bekakhumbula umsindvo wekuhwaya kweshoki uma ibhala ebhodini.

Kepha bekakhumbula kakhulu kwati kutsi gogo wakhe usekhaya yini – endzaweni lengekho ekudzeni kakhulu.

Kucabanga ngesikolwa kwenta sisu saMunene saba buhlungu. Njalo ekuseni, bekatjela Anti Bukiwe kutsi utiva agula kakhulu kutsi angaya esikolweni.



Anti Bukiwe wabona kutsi kunentfo lengahambi kahle. Wetama kusita Munene kutsi atayela indzawo yakhe lensha.

“Kungani ungahambi nami siye kamakhelwane? Bongani uneminyaka leyimfica budzala – njengawe!” wanika Munene langatikhetsela kuko, kepha Munene bekangatsandzi kuhlanguana nanobe ngubani lomusha.




“Ngikuphekele kudla kwakho lokutsandzako kwakusihlwa!” kwasho Anti Bukiwe, anika Munene isendwishi yeshizi letfoswe yafohlotela.

“Ngiyabonga, kepha angikalambi,” kwasho Munene, akhweshisela eceleni lipuleti lakhe.



Ebusuku, Anti Bukiwe weva Munene akhalela phasi emcamelweni wakhe. “Ingabe udzinga ihagi yini?” wabuta ngemusa, kepha Munene bekangafuni kuhagwa ngunobe ngubani ngaphandle kwagogo wakhe.



Anti Bukiwe wanika Munene sikhatsi sekutsi atayele indzawo, kepha ngemuva kwemaviki lambalwa tintfo betisolo tingahambi kahle.

“Munene, ngikhatsatekile ngawe. Ngicabanga kutsi ucindzetelekile emoyeni. Ubukene nekushonelwa ngumuntfu lomtsandza kakhulu. Usukile ekhaya waya endzaweni lesekudzeni kakhulu – ekudzeni nelikhaya lakini kanye nakubangani bakho. Ngicabanga kutsi udzinga lusito kute utive uncono,” kwasho yena.

Munene wahlala athulile emaminitshi lambalwa.

“Ingabe loko kusho kutsi kukhona yini lokubi ngami?” kwabuta Munene ngekwesaba.

“Cha, akunjalo,” kwasho Anti Bukiwe. “Ngiyati kutsi kuyenteka ubukwe kabi nangabe uya kudokotela wengcondvo, kepha kute lokufanele ube nemahloni ngako. Uma umtimba wakho ungakaphili kahle, kute emahloni ngekuya kadokotela. Uma ingcondvo nemiva yakho ingakaphili kahle, akukafanele kutsi ube nemahloni kuyobonana nadokotela wengcondvo. Mine ngibonana nadokotela wengcondvo njalo-nje kute angisite ngitive nginekuthula nekujabula,” washo amcinisekisa.

Ngemuva kwemalanga lambalwa, Anti Bukiwe wayisa Munene emtfolamphilo lokhetsekile. Balindza egumbini lekulindza.

Nakubitwa libito laMunene, wativa esaba.


“Ungakhatsateki, ngitawube ngilapha ngikulindzile,” kwasho Anti Bukiwe ambhumbhudza emhlane amcinisekisa.



Munene wahamba wangena ehhovisi lelincane,
lelikhanyako. Wahlala esitulweni lesintofontofo.

“Ngingu-Zain,” kwasho dokotela wengcondvo,
lobekahleti ambukile. “Ake sikhulume ngendlela lotiva
ngayo.”


“Ngitiva...” Munene wacala kukhuluma.



Lapho sekuphele li-awa, Munene wadvonsa kakhulu umoya, wabese uyaphuma ubuyela egumbini lekulindza.

“Utsini?” kwabuta Anti Bukiwe, ngekungabata.
“Bekunjani?”

“Angati nobe ngitiva ngincono yini nyalo...”
kwaphendvula Munene, kepha ngicabanga kutsi
ngiyafuna kuphindze ngibuye evikini lelitako.
Ngiyamtsandza Dkt. Wengcondvo
Zain – ngicabanga kutsi
kukhuluma naye
kungangisita.” Anti
Bukiwe wabamba
sandla saMunene
wasicinisa futsi
wamoyitela.





Kufundza 1

Ukhumbula bani Munene?

Munene ukhumbula gogo wakhe.

Bekahlala kuphi Munene nagogo wakhe?

Munene nagogo wakhe bebahlala eXigalo.

Kungani Anti waMunene Buyile bekhatsatekile ngaye?

- Bekakhatsatekile ngobe bekangafuni kuphuma embhedzeni.
- Munene bekangafuni kuya esikolweni.
- Munene bekangafuni kuhlangana nebantfu labasha.
- Munene bekangafuni kudla kudla kwakhe lakutsandzako.
- Ngobe bekatame kwenta yonkhe intfo labekangayicabanga kute asite Munene ative ancono, kepha kute lobekubonakala kumsita.



Kufundza 2

Kungani Munene aya eMamelodi?

Kwadzingeka aye eMamelodi kute ayohlala na-Anti wakhe Buyile ngobe besekushone gogo wakhe.

Ngukuphi kudla kwaMunene lakutsandzako?

Kudla kwaMunene lakutsandzako ngemasendwishi laneshizi latfoswe afohlotela.

Yini leyenta Anti Buyile aphetse ngekutsi kungenteka kutsi Munene ucindzetelekile emoyeni?

- Kungoba bekafuna kulala lilanga lonkhe. Bekangafuni kuphuma embhedzeni.
- Kungoba bekahlala njalo anebuhlungu esiswini futsi angafuni kuya esikolweni.
- Kungoba bekangafuni kuhlangana nebantfu labasha.
- Kungoba bekangafuni kudla – ngisho nobe kukudla kwakhe lakutsandzako.
- Kungoba Anti Buyile weva Munene akhala ebusuku.
- Kungoba gogo waMunene bekasandza kushona.
- Kungoba kwadzingeka kutsi Munene aye endzaweni lensha – yonkhe intfo beyintjintjile kuye!





NHLRP | National Home Language Reading Programme “